



UNIVERSITÄTS-
BIBLIOTHEK
PADERBORN

Universitätsbibliothek Paderborn

Sacrosancti Nominis Iesv Cvltvs Et Miracvla

Stengel, Carl

Augustae Vindellicorum, 1613

Parænesis Syntagmati nostro præuia, animam fidelem ad amorem & contemplationem dulcissimi Iesv excitans.

[urn:nbn:de:hbz:466:1-49813](https://nbn-resolving.org/urn:nbn:de:hbz:466:1-49813)



PARÆNESIS

Syntagmati nostro præuia, animam fidelem ad amorem & contemplationem dulcissimi IESU excitans.

IESVS CHRISTVS summi Patris filius, verus & omnipotens Deus suâ æternâ maiestate, potestate, opulentiâ nobilitate, gloriâ, pulchritudine, clementiâ, charitate, fidelitate, benignitate, bonitate, dulcedine, ceterisq; amabilibus perfectionibus suis, ad eò vniuersum creatum excedit intellectum, vt si cælum terraq; libris implerentur, vastissimûq; pelagus totum esset atramentû, & omnes spiritus angelici, cunctæq; animæ essent scriptores: citius ipsum mare scriptores exhaurirent, quam minimâ cuiuslibet perfectionis diuinæ partē absoluerent. Sed etsi cunctorû corda mortaliû simul vnita, hanc ipsam minimâ bonitatis, seu alterius perfectionis Dei partem (quantû quidē in hac vita licet) feliciter perciperent, atq; degustarent: mox omnia præ amore & gaudio scinderentur, & viribus deficerent, nisi sancti Spiritus temperante gra-

tiâ desuper corroborarentur. Nonne quoties
tu rerū pulchrarū species conspicias, & cælum,
terram, syluas, campos, vniuersum mundū ani-
mo perlustras, cuncta cor tuum huiusmodi vo-
cibus compellare videntur. Pensita quantū il-
le amabilis & formosus sit, qui condidit nos, &
est fons totius pulchritudinis? Huius sublimis
& gloriosi Domini Dei tui cor dulcissimum in-
comprehensibili, imensoq; & gratuito amoris
ardore semper erga te flagrauit & adhuc fla-
grat, vehementissimeq; desiderat, vt ad æter-
nam beatitudinē peruenias. Ipse idem pater
tuus cælestis ex indicibili charitate suâ nocte
dieq; perpetuò tibi intendit, & ita pro te soli-
citus est, ad eoque tui curam gerit, ac si nulla
alia vel in cælis, vel in terris creatura superesset.
Ipse tot tantisq; beneficiis omni temporis mo-
mento te præuenit ac prosequitur, vt vel exi-
guam eorum partem satis agnoscere nequeas,
Ipse liberrimā ad se accedendi copiam tibi præ-
bet: ita vt quoties libet, eum alloquaris, cuncta-
que cordis tui secreta, & omnes misérias tuas
illi securissimè pandas, atque in ipso pace frua-
ris & gaudio. Qui licet præstantissimum sit bo-
num, multò tamen citius faciliusq; vel solo pio
desiderio à te obtineri potest, quam quælibet
alia res, etiam vilissima. Iam cum ubiq; locorū
sit, & te incessanter intueatur, atque in intimo
nudoq; animæ tuæ fundo præsentē se exhibeat:
æquissimū sanè est, vt casto cum timore & re-
uerentia

uerentia coram ipso ingrediari, & eum toto corde amare, ei que omni studio placere desideres & contendas, vitans diligenter omnia, quæ diuinos illius oculos offendere possunt. Age igitur excusso terrenæ cupiditatis puluere, apertisq; mentis oculis, disce pro modulo tuo amanter contemplari & attendere radiantissimum veritatis lumen, ac deuotè recogitare iucundissimum illud bonum, videlicet Dominum Deum tuum, quem omni in loco, & maximè in animâ tuâ inuenire, ac de eius gratissimâ præsentia puram lætitiâ haurire potes, dicit illi:
O amabilissime Deus, IESV floride, tu mihi semper presens es. Redde me, queso, tibi placentem. Illumina animam meam splendore gratiæ tuæ, & accende eam igne amoris.

Nam excelsus ille Dominus, verbū æternum, verusq; Deus, ex solâ inenarrabili, stupendâ gratuitaq; charitate suâ, pro te immundo peccatore, abiectioq; vermiculo, dignatus est fieri homo & frater tuus. Nam relicta præstantissimâ naturâ angelicâ, excellentissimâ diuinitatem suam naturæ coniunxit humanæ: ita ut eum fratrem, os carnemq; tuam vocare possis, quod quidem totum angelicæ non est concessum sublimitati. Certè ad plenum scire non potes, quanta hinc tibi gratia, salus & gloria impensa sit, & olim impendetur, quantaq; pariat bona huius venerandi mysterij altitudo & diuinæ dignitatis dilectionisq; pia meditatio, clara cognitio,

ac sedula imitatio. Ipse triginta tribus annis laboravit, & summā ignominiam grauissimāque tormenta perpeffus est, atque ad extremū mortem turpissimam sustinuit, vt aboleret dilueretq; peccata tua, & pro eis satisfaceret, tibiq; regnū cæleste aperiret. Propter te floridū corpus suū verberibus patieter submisit, caput spinæ coronæ supposuit, manus ac pedes clavis obiecit, & preciosum sanguinem suum effudit. En ipse pendet in cruce vulneribus hiantibus, ac latere aperto: vt in gratissimum cordis sui cubiculum te introducat, ibiq; æterno complectatur amore. Instituit venerabile Sacramentum Eucharistiæ, in quo se totum tibi tradit: videlicet suam sublimem diuinitatem, præclaram animā suam, & corpus suum gloriosum. Vnde & minimū donum ab ipso profectum, quod in hoc Sacramento accipis, sempiterno quodam decore ac pulchritudine longè excellentius te exornat, quam vlla vnquā ætas quamlibet amæna terram ornauerit. Quomodo maiorem dilectionē, fidem, beneuolentiam & benignitatem tibi exhibere potuisset? Semper immenso tui tenetur desiderio, & ardentissima erga te flagrat charitate. Profectò dum tu ista æquo expendis libramento, mirum est te intus præ amore non colliquescere & præ gaudio atque exultatione non extra te abripi.

Hunc verò amorem nequaquā melius complecti cogitatione simul possumus, quam cum debito

debito venerationis affectu, erga suauissimum
omniq; dulcore dulcius I E S V nomē ferimur,
quem vt in cordibus tepidorum quorundā ex-
citaremus, hoc syntagma conscribere ex varijs
Auctoribus decreuimus. Quia verò nemo po-
test dicere Dominus I E S V S, nisi in Spīritu san-
cto, neque rectē illud, arque pro dignitate au-
dire, nisi in eodem Spīritu sancto, proinde ini-
tio huius tractatus inuocandus est nobis I E S V S,
atque illi cum Propheta supplicandum: *Deus*
in nomine tuo saluum me fac, & in virtute tua
iudica me: vt zelatores facti gloriæ sacrosancti
Nominis tui, inclusos mysteriorum thesauros
in hoc Nomine, ad fidelium lectorum vtilita-
tem, & consolationem, vtī decet, reserare
possimus.

Aptissimum est enim hoc nomen ad expi-
scanda corda nostra, à carnaliumq; cupiditatū
aquis extrahenda, amoreq; suo saucianda atq;
suspendenda, quoniam in hoc sacrosancto ac
mellifluo Nomine lectitare poteris illum pro
te incarnatum, pro te circumcisum, pro te sic
appellatum, pro te prædicasse, orasse, vigilasse,
suscepisse nudis pedibus peregrinationes, fu-
disse lachrymas, atque ieiunasse, pro te cruci
suffixum, mortuum, suscitatum, caelosq; con-
scendisse, atque inde largiter pro te Spīritum
sanctum in consolatorem, & præceptorem, in
pignus & arrham æternæ hæreditatis emisisse.

Qui ergo propter nos seruandos ex charitate

1. Cor. 12.

Nominis
IESV lau-
datores
quid face-
re in pri-
mis debe-
ant.

Psal. 53.

omnia agere voluit, dignus est, propter quem,
 & in cuius gloriam omnia opera nostra efficiamus.
 Quare S. Paulus dixit: *Siue ergo manducatis, siue bibitis, siue aliud quid facitis: omnia in gloriam Dei facite.* Nam & Pater hoc nomen gloriosum efficit: *Pater clarifica nomen tuum: Venit vox de celo, dicens: Et clarificauit, & iterum clarificabo.* Et ipse IESVS ait per Prophetam: *Sanctificabo nomen meum magnum, quod polluistis in gentibus: & de Spiritu sancto idem dixit: Ille me clarificabit, quia de meo accipiet.* Angeli quoque hoc nomen prædicant, quorum vnus dixit: *Euangelizo vobis gaudium magnum, quod erit omni populo: quia natus est vobis hodie SALVATOR, qui est Christus Dominus.* Homines, præsertim iusti, in hoc nomine illustrando vitam consumere debent. Dæmones ipsi etiam istud nomen, vel coacti clarificant, dum vel recedunt de corporibus ad huiusce nominis inuocationem, vel flectunt genua: mali etiam & infideles, vt exorcistæ illi Sceuz, Actor. 19. in quos inuolauit dæmon: *IESVM, inquit, noui; & Paulum scio: vos autem qui estis?* Quamobrem rectè Christus dixit: *In nomine meo demonia eiicient, linguis loquentur nouis, serpentes tollent, & si mortiferum quid biberint, non eis nocebit, super agros manus imponent, & benè habebunt.* Inest igitur in nomine hoc virtus implendi omnia desideria: nam quicquid petierimus Patrem in hoc nomine, liberaliter no-

bis dat. Si enim tristis es, consolatur: si peccator, iustificat: si ea, quæ tuæ salutis sunt, ignoras, docet: si pauper es, ditat: si ignobilis, nobilitat: si iustus, conseruat & perficit: si periculum instat, præseruat: si cecidisti, subleuat: si æger es, sanat. Vt enim Principes insignem penes se habere solent medicum, cuius ope atq; operâ morbis vel occurrant præsentibus, vel resistent futuris: ita nobis nomen suum saluare potens medici instar reliquit, ne ipsis magnis huius mundi Principibus inferiores simus. Quippe apud Christû omnes sunt magni Principes, qui eum diligunt, colunt, atq; venerantur. Est igitur hoc sacrosanctum nomen *oleum* siue vnguentum *effusum*, benè olens naribus fidelium; cibus ac *panis vite* esurientibus, habendumq; vt mel linguæ, melos auribus, lux oculis, cordi iubilus, medicina morbis, portus nauigantibus, *turris fortissima iustis, ad quam confugiet iustus, & saluabitur*. Estq; huiusmodi nomen dignum omni cultu, genuflexione atque latriâ: in quo vult Paulus flecti omne genu, cælestium, terrestrium, atque infernorum. Tale enim nomen **I E S V**, siue vbicunque scriptum, aut pictum, sculptumq;, dignum est latria, non ob ipsam vocem nudam, scripturam, vel picturam, verùm propter eius significatum: sicuti crux, atq; imago Christi propter typum, mysteriumq; in ea repræsentatum, latriâ merito adorantur. Ioannes verò vigesimus secundus

Cant. 1.

Ioan. 6.

Prov. 18.

Philip. 2.

dus

dus ducentos dies veræ indulgentiæ omnibus,
 qui ad nomen IESV genua flecterent, vel ca-
 put inclinarent, vel tunderent pectus, largitus
 est. Ergò adora reuerenter hoc sacrosanctum
Nomen, inuoca ex corde: quia *omnis qui inuo-*
cauerit nomen Domini, saluus erit. Confitere
 lingua coram hominibus, vt dignus habearis,
 quem IESVS confiteatur coram patre suo.
 Gloriare in hoc nomine, & exulta in eo, vti B.
 Virgo: *Exultauit, inquit, spiritus meus in Deo*
salutari meo. Nos enim gloriamur in appella-
 tiuis, quod videlicet de tali familia, vel proge-
 nie illustri, quia vani sumus. Patere pro hoc no-
 mine, vt Apostoli, *qui ibant gaudentes à conspe-*
ctu concilii: quoniam digni habiti sunt pro nomi-
ne IESV contumeliam pati. Benedic frequenter
 & dic cum patientissimo Iob, & pijsimo Rege:
Sit nomen Domini benedictum. Nam lingua plus
 ad IESVM laudibus celebrandum, quàm ad
 gustandum, vel ad animi sensa explicanda con-
 dita est. Hinc Propheta ait: *Laudabo nomen*
Dei cum cantico; & magnificabo eum in laude.
 Expende nomen tuum in hoc nomine clarifi-
 cando, atque cohonestando: *Beati enim estis,*
 (ait Christus) *cum maledixerint vobis homines*
& persecuti vos fuerint, & dixerint omne malum
aduersum vos, mentientes propter me. Vt enim
 IESVS finis est omnium rerum; ita omnium
 nominum finis est IESV nomen. Et scribe
 hoc sanctum nomen in tabulis cordis tui; nam

Deus

Deus in capite libri vitæ, in quo sunt omnes prædestinati, principem locum tenet. Fuit etiam in ligno crucis id scriptum literis Latinis, Græcis, & Hebræis, ad pugnandum pro nobis. Est item scriptum in portis cęlestis Hierusalem, ut narratur Apocal. 22. quod nulli pateat ingressus, nisi in virtute huius nominis. Nemo que benè pati potest pro Christo, nisi cor eius nominis huius virtute atque dulcedine sit delibutum. Quemadmodum autem in prælio, qui excubias agunt nocturno tempore, ut se inuicem agnoscant, salutis causa nomen dant, quasi tesseram: sic nos cum in continuo conflictu, tenebrisque versemur, IESU nomen demus, ut ab imminente periculo liberemur, & salute æternâ perfruamur, præstante eodem Domino nostro IESU Christo, cui cum Patre, & Spiritu sancto deferatur omnis honos, gloria, laus, maiestas, & Imperium in secula seculorum. Amen.

Psal. 39.
Hebr. 10.
Exodi 32.
Dan. 12.
et
Luc. 10.
Ioan. 9.